

REGIONAAL ARCHIEF LEIDEN
OUD BISSCHOPPELIJKE CLEREZY TE UTRECHT
COLLECTIE UTRECHT, OUD KATHOLIEKE KERK

INVENTARIS NUMMER 0226-30

EIGENDOMSBEWIJS VAN 7 MORGEN LAND
IN TEDINGERBROEK IN ZOETERWOUDE

1410

1 CHARTER

BEWERKING DOOR
ANTHONIUS VAN DER TUIJN
TE RHOON

Als u gegevens uit deze bewerking gebruikt maakt voor genealogische of historische doeleinden, dient een verwijzing naar deze bewerking vermeld te worden. Bij gebruikmaking van gegevens uit deze bewerking ten behoeve van publicaties, in welke vorm dan ook, moet een adequate bronvermelding naar deze bewerking worden vermeld.

Wi Sijmon Bort ende Pieter van Leijden Dircx soen scepenen in Leijden oirconden dat voir ons quamen Claes Vrancken soen ende Jacop Jans soen ende ghelieden dat zi Dirc Florijs soen vercoft hebben seven morghen lants mitter huijsinge die dair up staet. Welc lant ende huijsinge ghelegen sien inden ambocht van Zoeterwoude ende in Tedingher broec ende heeft belegen an die een zide die cureijt van Nootdorp ende an die ander zide Claes Jan Bruunsz. Ende Claes ende Jacop voirsr. loveden mit ghezamender hant ende elc voir al Dirc Florijs soen dit voirsr. lant ende huijsinge te waren jair ende dach alse recht is ende men een vri erve sculdich is te waren wtgheset een pont comans pajments siairs dat up dit voirsz. lant staet. In oirkonde desen brieve bezeghelt mit onsen zeglen. Int jair ons heren duysent vierhondert ende tien des woensdage na Pijnxster.

IDEM 0226-31
EIGENDOMSBEWIJS VAN 5 MORGEN LAND
IN TEDINGERBROEK IN ZOETERWOUDE
1444
1 CHARTER

Wi Pieter van Bossch scout inden ambocht van Zoeterwoude doe condit allen luijden dat voir ons quamen Willem Coop ende Pouwels Coope gebroeders ende gelieden dat sij vercoft hebben Willem jonge Dircx zoon vijf morgen lants gelegen inden ambochte van Zoeterwoude in Tedingerbroeck ende leggen in Mees Louwen zoons weer. Ende heeft belegen uptie oestzijde ende uptie westzijde dat clooster van Conincxvelt. Ende Willem Cope ende Pouwels voirsz. loifden dit voirn. lant te waren, jair ende dach als recht is, als men vrij eijgen lant sculdich is te waren geliken buijrlant. Voirt so belijeden Willem ende Pouwels voirsz. van dese voirsz. coope wel voldaan ende betaelt, den lesten penninck mitten eersten. In kennisse der wairheden so heb ic Pieter van Bossch als scout voirsz. desen brief bezegelt mit mijn zegel. Int jair ons heren duysent vierhondert vier ende viertich upten sestiende dach in aprilte.

IDEM 0226-32
EIGENDOMSBEWIJS VAN EEN RENTE VAN 20 POND
VERZEKERD OP EEN WONING EN 6 MORGEN
LAND AAN DE VLIET IN DE WEIPOORT
IN ZOETERWOUDE
1528
1 CHARTER

Ick Ghijsbrecht van Zwieten ambachts heer ende schout inden ambocht van Zoeterwoude doe kondt ende kenlijck allen luijden dat voer mij quam Cornelijs Florijsz. ant die Weijpoort ende ghelijede ende bekende voer hem, mijn, zijn erven vercoft te hebben ende sculdich is alle jaere heer Heijnrick Ghijsbrechtsz. twijntich pont hollants tsiaers dertich comants groten gherekendt voer een pont, vrijen ghelts van allen anghelden. Ende dese voersz. twijntich pondt hollants te betalen die een helft den eersten daech in meije ende die ander helft op Alreheijlijghen daech. Daer dat eerste jaer renten ende dach van betalinghen hijer of wesen ende verschijnen sal op meijen daech naestcomende die een helft vander voersz. summa ende die ander helft vander voersz. summe. Te betalen op Alreheijlijghen daech daer an naestcomende ende soe voirt van half jaer tot half jaer dese voersz. twijntich pont te betalen alle jaers, duijrende alsoe langhe als heer Heijnrick Ghijsbrechtsz. in levende zijne lijf ende dan nijet langher. Ende of heer Heijnrick Ghijsbrechtsz. voorsz. sturve ende eenich van den termijnen nijet al te vollen verschenen en waren noch verlopen soe en sal Cornelijs of zijn erven van dat termijn nijet gheven ende alte maele hijer of vrije ende quijt wesen van die ghehele summe voersz. ende de verschenen renten van der half jaer. Ende dese voersz. twijntich pont sal heer Heijnrick voersz. of zijnre ghemacht moghen verzijen ende verhalen van termijn tot termijn ende staen op een wonijnck, huijs, barghen ende poterije daer op staende, daer Cornelijs Florijsz. nuter tijt op woent ende op ses morghen lants, ghelegghen after an die voersz. wonijnghe ende hebben altemalen belegghen inden voersz. amboecht in die Weijpoort, an dat oest eijnde die Vlijet ende die zuijtzijde en dat west eijnde Cornelijs Florijsz. selver ende die noert zijde Cornelis Jacobsz. Ende voert te moghen verhalen an all

die ander reste goeden die Cornelijs Florijsz. voersz. nu ter tijt heeft of vercrijghen sal moghen, waer ende waer an die gheleghen zijn of waermen die sal moghen bevinden dat zijn steden of deur buijten. Ende Cornelijs Florijsz. voersz. ghelovede voer hem ende zijn erven dese voersz. lijfrenten heer Heijnrick voersz. vrije te waren als recht is als men op alsulcken voersz. wonijnck nijedts die voersz. ses morghen lants alsulcke voersz. lijfrenten schuldich is te waren ende niet meer op en staet dan twije gouden wilhelmus schilden tsiaers die Sinte Anthonis broederscap in Sinte Pieters kerck tot leijden daer op heeft ende dese voersz. twijntijch pont. Ende Cornelijs Florijsz. voersz. ghelove voer hem ende zijnen erven hijer gheen meer van recht teghens te doen, noch doen doen in eenigher manijeren, gheestelijck noch waerlijck noch mijt ghenen nuwen loese vonden die men hijer teghen contrarie ende moghen verziieren om inder betalingen soude moghen letten of decen. Ende van desen coope soe belijede hem Cornelijs Florijsz. van heer Heijnrick Ghijsbrechtsz. priester wel voldaan te wesen, den laetsten pennijnck mijten eersten. Alle argelist wt ghesondert, bij kennisse der waerheijt soe hebbe ick Ghijsbrecht van Zwijeten amboechts heer ende schout inden voersz. amboecht desen brief beseghelt mijt mijnen selfs zeeghel hijer onder an ghehanghen. Daer bij waren als tuijghen Gherijt Jansz. ende Willem Claesz. Int jaer ons heren vijftien hondert ende acht ende twijntich den acht ende twijntichsten dach in november.

IDEM 0226-33

**EIGENDOMSBEWIJS VAN EEN ERFPACHTRENT
VAN 7 POND, GAANDE UIT 18½ MORGEN LAND
IN BAN VAN STPOMPMWIJK IN ZOETERWOUDE**

1535

1 CHARTER

Ic Gerijt Boeckelsz. Buijtewech poorter ende inwoender de stede van Leijden bekenne ende belije bij desen dat ick ghecoft hebbe van Gerijt Pieter Vranckesz. negentiendalve morghen landts, bij den hoop sonder maete, geleghen inden ambocht van Soeterwoude ende inden ban van Stompwijk. Onder welcke voersz. landen tconvent tot Heemstede buijten Haerlem jaerlicx hebben up vierthien merghen landts een eewijghe erfpachts van seven ponden hollants, verschijnende alle jaere tot Alre heijlighen daghe. All breeder blickende bijde brieven daer van wesende. Rustende de eenen onder den voesz. convente van Heemstede ende dander onder mij Gerijt Boeckelsz. voorn. Welcke voersz. seven ponden hollants stuck van dertich comans grooten ic Gerijt Boeckelsz. voersz. bekenne van nu voortaan voor mij ende mijnen erven schuldich te wesen. Alsoe ick dije voersz. landen ghecoft hebbe ende gelove die alle jaere te betalen nae volgende tinhouden vande voerseijde brieven. In oerconden desen zoe heb ic Gerijt Boeckelsz. voersz. mijn zeghel hier onder an gheanghen. Ende tot meerder kennisse mijn naem hier onder gescreven. Upten derthienden dach in december inden jaere duijsent vijfhondert vijff ende dertich